

四庫全書

集部

欽定四庫全書

集部

唐賢三昧集卷上

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官編修臣徐秉敬

謄錄監生臣陳寶君

欽定四庫全書

集部八

唐賢三昧集

總集類

提要

臣等謹按唐賢三昧集三卷

國朝王士禎編士禎有古懽錄已著錄初士禎少年嘗與其兄士祿撰神韻集見所作居易錄中然其書為人改竄已非其舊故晚定此編皆錄盛唐之作名曰三昧取佛經自在義

也詩自太倉歷下以雄渾博麗為主其失也
庸公安竟陵以清新幽渺為宗其失也詭學
者兩途並窮不得不折而入宋其弊也滯而
不靈直而好盡語錄史論皆可成篇於是士
禎等重申嚴羽之說獨主神韻以矯之蓋亦
救弊補偏各明一義其後風流相尚光景流
連趙執信等遂復操二馮舊法起而相爭所
作談龍錄排詆是書不遺餘力其論雖非無

見然兩說相濟其理乃全殊途同歸未容偏
廢今仍並錄存之以除門戶之見又閻若璩
潛邱劄記有與趙執信書詆此集所錄如張
旭四絕句本宋蔡襄詩而誤收又詆其祖詠
詩誤以京水為涇水孟浩然詩誤以潯陽為
潯陽王維詩誤以御亭為卸亭蔡洲為蔡州
高適燕歌行誤以榆關為榆關全不講於地
理之學引据精詳皆切中其病然士禎自品

詩格原不主於考証若璩所云不必為是集
諱亦不必為是集病也乾隆四十六年十月
恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

唐賢三昧集卷上

刑部尚書王士禎編

王維

贈劉藍田

籬間犬迎吠出屋候荆扉
歲晏輸井稅山村人夜歸
晚田始家食餘布成我衣
詎肯無公事煩君問是非

贈祖三詠

蟪蛄挂虛牖蟋蟀鳴前除歲晏涼風至君子復何如高
館閒無人離居不可道閒門寂已閉落日照秋草雖有
近音信千里阻河關中復客汝潁去年歸舊山結交二
十載不得一日展貧病子既深契闊余不淺仲秋雖未
歸暮秋以為期良會詎幾日終日長相思

戲贈張五弟諲

吾弟東山時心尚一何遠日高猶自卧鐘動始能飯領
上髮未梳牀頭書不卷清川興悠悠空林對偃蹇青苔

石上淨細草松下軟牕外鳥聲閒階前虎心善徒然萬
象多澹爾太虛緬一知與物平自顧為人淺對君忽自
得浮念不煩遣

奉寄韋太守陟

荒城自蕭索萬里山河空天高秋日迴嘹唳聞歸鴻寒
塘映衰草高館落疎桐臨此歲方晏顧景詠悲翁故人
不可見寂寞平陵東

和使君五郎西樓望遠思歸

高樓望所思極目情未畢枕上身十里牕中窺萬室悠
悠長路人曖曖遠郊日惆悵極浦外迢遞孤烟出能賦
屬上才思歸同下秩故鄉不可見雲水空如一

送魏郡李太守赴任

與君伯氏別又欲與君離君行無幾日當復隔山陂蒼
茫秦川盡日落桃林塞獨樹臨關門黃河向天外前經
洛陽陌宛洛故人稀故人離別盡淇上轉驂駢企予悲
送遠惆悵睢陽路古木官渡平秋城鄴宮故想君行縣

日其出從如雲遙思魏公子復憶李將軍

送宇文太守赴宣城

寥落雲外山迢遙舟中賞
饒吹發西江秋空多清響
地迴古城蕪月明寒潮廣
時賽敬亭神復解罟師網
何處寄相思南風吹五兩

送別

下馬飲君酒問君何所之
君言不得意歸卧南山陲
但去莫復問白雲無盡時

濟州送祖三

相逢方一笑相送還成泣
祖帳已傷離荒城復愁入
天寒遠山淨日暮長河急
解纜君已遙望君猶佇立

送綦毋潛落第還鄉

聖代無隱者英靈盡來歸
遂令東山客不得顧采薇
既至君門遠孰云吾道非
江淮度寒食京洛縫春衣
置酒臨長道同心與我違
行當逢桂棹未幾拂荆扉
遠樹帶行客孤城當落暉
吾謀適不用勿謂知音稀

別弟縉後登青龍寺望藍田山

陌上新別離蒼茫四郊晦登高不見君故山復雲外遠
樹蔽行人長天隱秋塞心悲宦遊子何處飛征蓋

藍田山石門精舍

落日山水好漾舟信歸風探竒不覺遠因以緣源窮遙
愛雲木秀初疑路不同安知清流轉偶與前山通捨舟
理輕策果然愜所適老僧四五人逍遙蔭松柏朝梵林
未曙夜禪山更寂道心及牧童世事問樵客暝宿長林

下焚香卧瑶席澗芳襲人衣山月映石壁再尋畏迷誤
明發更登厯笑謝桃源人花紅復來覲

青谿

言入黃花川每逐青谿水隨山將萬轉趣途無百里聲
喧亂石中色靜深松裏漾漾汎菱苕澄澄映葭葦我心
素已閒清川澹如此請留盤石上垂釣將已矣

崔濮陽兄季重前山興

秋色有佳興況君池上閒悠悠西林下自識門前千

里橫黛色數峰出雲間嵯峨對秦國
合沓藏荆關殘雨斜日照夕嵐
飛鳥還故人今尚爾歎息此顏顏

丁寓田家有贈

君心尚棲隱久欲傍歸路在朝每為言
解印果成趣晨雞鳴鄰里羣動從所務
農夫行餉田閨妾起縫素開軒御衣服
散帙理章句時吟招隱詩或製閒居賦
新晴望郊郭日映桑榆暮陰盡小苑城
微明渭川樹揆予宅閭井幽賞何由屢
道存終不忘迹異難相遇此時惜離別

再來芳菲度

渭川田家

斜陽照墟落窮巷牛羊歸
野老念牧童倚杖候荆扉
雉鳴麥苗秀蠶眠桑葉稀
田夫荷鋤至相見語依依
即此羨閒逸悵然吟式微

春中田園作

屋上春鳩鳴村邊杏花白
持斧伐遠揚荷鋤覘泉脈
歸燕識故巢舊人看新歷
臨觴忽不御惆悵遠行客

過李揖宅

閒門秋草色終日無車馬客來深巷中
犬吠寒林下散髮時未簪道書行尚把
與我同心人樂道安貧者一罷宜城酌
還歸洛陽社

宿鄭州

朝與周人辭暮投鄭人宿他鄉絕儔侶
孤客親僮僕宛洛望不見秋霖晦平陸
田父草際歸村童雨中牧主人東臯上
時稼遶茆屋蟲思機杼悲雀喧禾黍熟
明當渡

京水昨晚猶金谷此去欲何言窮邊徇微祿

西施詠

豔色天下重西施寧久微朝為越谿女暮作吳宮妃賤
日豈殊衆貴來方悟稀邀人傳香粉不自著羅衣君寵
益嬌態君憐無是非當時浣紗伴莫得同車歸持謝

紀事

作寄鄰家子效顰安可希

夷門歌

七雄雄雌猶未分攻城殺將何紛紛秦兵益圍邯鄲急

魏王不救平原君公子為嬴停駟馬執轡愈恭意愈下
亥為屠肆鼓刀人嬴乃夷門抱關者非但慷慨獻奇謀
意氣兼將身命酬向風刎頸送公子七十老翁何所求

隴頭吟

長城少年游俠客夜上戍樓看太白隴頭明月迴臨關
隴上行入夜吹笛關西老將不勝愁駐馬聽之雙淚流
身經大小百餘戰麾下偏裨萬戶侯蘇武纔為典屬國
節旄空盡海西頭

老將行

少年十五二十時步行奪取胡馬騎射殺陰山白額虎
肯數鄴下黃鬚兒一身轉戰三千里一劍曾當百萬師
漢兵奮迅如霹靂虜騎崩騰畏疾藜衛青不敗由天幸
李廣無功緣數奇自從棄置便衰朽世事蹉跎成白首
昔時飛雀無全目今日垂楊生左肘路傍時賣故侯瓜
門前學種先生柳蒼茫古木連窮巷寥落寒山對虛牖
誓令疏勒出飛泉不似潁川空使酒賀蘭山下陣如雲

羽檄交馳日夕聞
節使三河募年少
詔書五道出將軍
試拂鐵衣如雪色
聊持寶劍動星文
願得燕弓射天將
恥令越甲鳴吾君
莫言舊日雲中守
猶堪一戰立功勲

桃源行

漁舟逐水愛山深
兩岸桃花夾去津
坐看紅樹不知遠
行盡青谿不見人
山口潛行始隈隩
山開曠望旋平陸
遙看一處攢雲樹
近入千家散花竹
樵客初傳漢姓名
居人未改秦衣服
居人共住武陵源
還從物外起田園

月明松下房櫳靜日出雲中雞犬喧驚聞俗客爭來集
競引還家問都邑平明閭巷掃花開薄暮漁樵乘水入
初因避地去人間及至成仙遂不還峽裏誰知有人事
世中遙望空雲山不疑靈境難聞見塵心未盡思鄉縣
出洞無論隔山水辭家終擬長游衍自謂經過舊不迷
安知峰壑今來變當時只記入山深青谿幾曲到雲林
春來遍是桃花水不辨仙源何處尋

故人張諲工詩善易卜兼能丹青草隸項以詩見

贈聊獲酬之

不逐城東遊俠兒，隱囊紗帽坐彈碁。
蜀中夫子時開卦，洛下書生解詠詩。
藥欄花逕衡門裏，時復據梧聊隱几。
屏風誤點惑孫郎，團扇草書輕內史。
故園高枕度三春，永日垂帷絕四鄰。
自惜蔡邕今已老，更將書籍與何人。
輞川閒居贈裴秀才迪

寒山轉蒼翠，秋水日潺湲。
荷杖柴門外，臨風聽暮蟬。
渡頭餘落日，墟里上孤烟。
復值接輿醉，狂歌五柳前。

寄荊州張丞相

所思竟何在，悵望深荆門。
舉世無相識，終身思舊恩。
方將與農圃，藝植老丘園。
目盡南無鴈，何由寄一言。

冬晚對雪憶胡居士家

寒更傳曉箭，清鏡覽衰顏。
隔牖風驚竹，開門雪滿山。
灑空深巷靜，積素廣庭閒。
借問袁安舍，脩然尚閉關。

酬虞部蘇員外過藍田別業不見留之作

貧居依谷口，喬木帶荒村。
石路枉迴駕，山家誰候門。
漁

舟膠凍浦獵火燒寒原唯有白雲外疎鐘聞夜猿

酬張少府

晚年唯好靜萬事不關心自顧無長策空知返舊林松風吹解帶山月照彈琴君問窮通理漁歌入浦深

送丘為落第歸江東

憐君不得意況復柳條春為客黃金盡還家白髮新五湖三畝宅萬里一歸人知禰不能薦羞稱獻納臣

送李判官赴江東

聞道皇華使方隨皂蓋臣封章通左語冠冕化文身樹
色分揚子潮聲滿富春遙知辨璧吏恩到泣珠人

送岐州源長史歸

握手一相送心悲安可論秋風正蕭索客散孟嘗門故
驛通槐里長亭下槿原征西舊旌節從此向河源

同崔興宗送衡嶽瑗公南歸

言從石菌閣新下穆陵關獨向池陽去白雲留故山綻
衣秋日裏洗鉢古松間一施傳心法唯將戒定還

送丘為往唐州

宛洛有風塵君行多苦辛
四愁連漢水百口寄隨人
槐色陰清晝楊花惹暮春
朝端肯相送天子繡衣臣

送元中丞轉運江淮

薄稅歸天府輕徭賴使臣
歡霑賜帛老恩及卷綃人
去問珠官俗來經石蚌春
東南御亭上莫使有風塵

送崔九興宗遊蜀

送君從此去轉覺故人稀
徒御猶回首田園方掩扉
出

門當旅食中路授寒衣江漢風流地遊人何歲歸

送平澹然判官

不識陽關路新從定遠侯黃雲斷春色畫角起邊愁瀚
海經年到交河出塞流須令外國使知飲月氏頭

送劉司直赴安西

絕域陽關道胡沙與塞塵三春時有鴈萬里少行人首
宿隨天馬葡萄逐漢臣當令外國懼不敢覓和親

送方城韋明府

遙思葭菼際寥落楚人行高鳥長淮水平蕪故郢城使
車聽雉乳縣鼓應雞鳴若見州從事無嫌手板迎

送梓州李使君

萬壑樹參天千山響杜鵑山中一夜雨樹杪百重泉漢
女輸幢布巴人訟芋田文翁翻教授不敢倚先賢

送張五諲歸宣城

五湖千萬里況復五湖西漁浦南陵郭人家春穀谿欲
歸江淼淼未到草萋萋憶想蘭陵鎮可宜猿夜啼

送人南歸

萬里春應盡三江鴈亦稀連天漢水廣孤客郢城歸
鄖國稻苗秀楚人菰米肥懸知倚門望遙識老萊衣

送賀遂員外外甥

南國有歸舟荆門汭上流蒼茫葭菼外雲水與昭丘
檣帶城烏去江連暮雨愁猿聲不可聽莫待楚山秋

送楊長史赴果州

裋斜不容幘之子去何之鳥道一千里猿聲十二時官

橋祭酒客山木女郎祠別後同明月君應聽子規

送邢桂州

饒吹喧京口風波下洞庭
赭圻將赤岸擊汰復揚舲
日落江湖白潮來天地青
明珠歸合浦應逐使臣星

送孟六歸襄陽

杜門不復出久與世情疎
以此為長策勸君歸舊廬
醉歌田舍酒笑讀古人書
好是一生事無勞獻子虛

登裴秀才迪小臺

端居不出戶滿目望雲山落日鳥邊下秋原人外閒遙
知遠林際不見此簷間好客多乘月應門莫上關

過香積寺

不知香積寺數里入雲峰古木無人逕深山何處鐘泉
聲咽危石日色冷青松薄暮空潭曲安禪制毒龍

過感化寺曇興上人山院

暮持筇竹杖相待虎谿頭催客聞山響歸房逐水流野
花叢發好谷鳥一聲幽夜坐空林寂松風直似秋

登辨覺寺

竹徑從初地蓮峰出化城
牕中三楚盡林上九江平
軟草乘趺坐長松響梵聲
空居法雲外觀世得無生

喜祖三至留宿

門前洛陽客下馬拂征衣
不枉故人駕平生多掩扉
行人返深巷積雪帶餘暉
早歲同袍者高車何處歸

山居秋暝

空山新雨後天氣晚來秋
明月松間照清泉石上流
竹

喧歸浣女蓮動下漁舟隨意春芳歇王孫自可留

終南別業

中歲頗好道晚家南山陲興來每獨往勝事空自知行
到水窮處坐看雲起時偶然值林叟談笑無還期

歸嵩山作

清川帶長薄車馬去閒閒流水如有意暮禽相與還荒
城臨古渡落日滿秋山迢遞嵩高下歸來且閉關

歸輞川作

谷口疎鐘動漁樵稍欲稀悠然遠山暮獨向白雲歸
菱蔓弱難定楊花輕易飛東臯春草色惆悵掩柴扉

終南山

太乙近天都連山到海隅白雲迴望合青靄入看無
分野中峰變陰晴衆壑殊欲投人處宿隔水問樵夫

觀獵

風勁角弓鳴將軍獵渭城草枯鷹眼疾雪盡馬蹄輕
忽過新豐市還歸細柳營迴看射鵰處千里暮雲平

漢江臨汎

楚塞三湘接荆門九派通江流天地外山色有無中郡
邑浮前浦波瀾動遠空襄陽好風日留醉與山公

登河北城樓作

井邑傳巖上客亭雲霧間高城眺落日極浦映蒼山岸
火孤舟宿漁家夕鳥還寂寥天地暮心與廣川閒

使至塞上

單車欲問邊屬國過居延蓬出漢塞歸鴈入胡天大

漠孤烟直長河落日圓蕭關逢候吏都護在燕然

秋夜獨坐

獨坐悲雙鬢空堂欲二更雨中山果落燈下草蟲鳴白
髮終難變黃金不可成欲知除老病唯有學無生

奉和聖製從蓬萊向興慶閣道中留春雨中春望
之作應制

渭水自縈秦塞曲黃山舊遶漢宮斜鑾輿迴出仙門柳
閣道迴看上苑花雲裏帝城雙鳳闕雨中春樹萬人家

為乘陽氣行時令不是宸遊翫物華

敕賜百官櫻桃

芙蓉闕下會千官紫禁朱櫻出上闌
纔是寢園春薦後
非關御苑鳥銜殘
歸鞍競帶青絲籠
中使頻傾赤玉盤
飽食不須愁內熱
大官還有蔗漿寒

敕借岐王九成宮避暑應教

帝子遠辭丹鳳闕
天書遙借翠微宮
隔牕雲霧生衣上
卷幔山泉入鏡中
林下水聲喧語笑
巖間樹色隱房櫳

仙家未必能勝此何事吹笙向碧空

和太常韋主簿五郎溫湯寓目之作

漢主離宮接露臺秦川一半夕陽開青山盡是朱旗繞
碧澗翻從玉殿來新豐樹裏行人度小苑城邊獵騎迴
聞道甘泉能獻賦懸知獨有子雲才

酬郭給事

洞門高閣靄餘輝桃李陰陰柳絮飛禁裏疎鐘官舍晚
省中啼鳥吏人稀晨搖玉珮趨金殿夕奉天書拜瑣闥

強欲從君無那老將因卧病解朝衣

出塞作

居延城外獵天驕白草連山野火燒暮雲空磧時驅馬
秋日平原好射鵬護羌校尉朝乘障破虜將軍夜渡遼
玉靶角弓朱勒馬漢家將賜霍嫖姚

送楊少府貶郴州

明到衡山與洞庭若為秋月聽猿聲愁看北渚三湘遠
惡說南風五兩輕青草瘴時過夏口白頭浪裏出湓城

長沙不久留才子賈誼何須弔屈平

過乘如禪師蕭居士嵩丘蘭若

無著天親弟與兄嵩丘蘭若一峰晴
食隨鳴磬巢鳥下行踏空林落葉聲
迸水定侵香案濕雨花應共石牀平
深洞長松何所有儼然天竺古先生

春日與裴迪過新昌里訪呂逸人不遇

桃源一向絕風塵柳市南頭訪隱淪
到門不敢題凡鳥看竹何須問主人
城上青山如屋裏東家流水入西鄰

閉戶著書多歲月種松皆作老龍鱗

酌酒與裴迪

酌酒與君君自寬人情翻覆似波瀾白首相知猶按劍
朱門先達笑彈冠草色全經細雨濕花枝欲動春風寒
世事浮雲何足問不如高卧且加餐

積雨輞川莊作

積雨空林烟火遲蒸藜炊黍餉東菑漠漠水田飛白鷺
陰陰夏木轉黃鸝山中習靜觀朝槿松下清齋折露葵

野老與人爭席罷海鷗何事更相疑

送秘書晁監還日本

積水不可極安知滄海東九州何處所萬里若乘空向
國唯看日歸帆但信風鰲身映天黑魚眼射波紅鄉樹
扶桑外主人孤島中別離方異域音信若為通

送李太守赴上洛

商山包楚鄧積翠靄沈沈驛路飛泉灑關門落照深野
花開古戍行客響空林板屋春多雨山城晝易陰丹泉

通號略白羽抵荆岑若見西山爽應知黃綺心

曉行巴峽

際曉投巴峽餘春憶帝京晴江一女浣朝日衆禽鳴水
國舟中市山橋樹杪行登高萬井出眇迴二流明人作
殊方語鶯為故國聲賴多山水趣稍解別離情

息夫人

莫以今時寵能忘舊日恩看花滿眼淚不共楚王言

班婕妤

宮殿生秋草君王恩幸疎
那堪聞鳳吹門外度金輿

輞川集

孟城坳

新家孟城口古木餘衰柳
來者復為誰空悲昔人有

華子岡

飛鳥去不窮連山復秋色
上下華子岡惆悵情何極

斤竹嶺

檀欒映空曲青翠漾漣漪
暗入商山路樵人不可知

鹿柴

空山不見人但聞人語響返景入深林復照青苔上

木蘭柴

秋山斂餘照飛鳥逐前侶彩翠時分明夕嵐無處所

文杏館

文杏裁為梁香茅結為宇不知棟裏雲去作人間雨

宮槐陌

仄迳蔭宮槐幽陰多綠苔簷門但迎掃畏有山僧來

南垞

輕舟南垞去北垞
祿難即隔浦望人家
遙遙不相識

歌湖

吹簫凌極浦
日暮送夫君
湖上一回首
青山卷白雲

樂家瀨

颯颯秋雨中
淺淺石溜瀉
跳波自相濺
白鷺驚復下

白石灘

清淺白石灘
綠蒲向堪把
家住水東西
浣紗明月下

北垞

北垞湖水北雜樹映朱欄
逶迤南川水明滅青林端

竹里館

獨坐幽篁裏彈琴復長嘯
深林人不知明月來相照

辛夷塢

木末芙蓉花山中發紅萼
澗戶寂無人紛紛開且落

漆園

古人非傲吏自闕經世務
偶寄一微官婆婆數株樹

皇甫嶽雲谿雜題

鳥鳴磻

人間桂花落夜靜春山空月出驚山鳥時鳴春澗中

鷓鴣堰

乍向紅蓮沒復出青蒲颺獨立何離襪銜魚古查上

上平田

朝耕上平田暮耕上平田借問問津者寧知沮溺賢

萍池

春池深且廣會待輕舟迴靡靡綠萍合垂楊掃復開
答裴迪輞口遇雨憶終南山之作

淼淼寒流廣蒼蒼秋雨晦君問終南山心知白雲外
送別

山中相送罷日暮掩柴扉春草年年綠王孫歸不歸
臨高臺送黎拾遺

相送臨高臺川原杳何極日暮飛鳥還行人去不息
崔九弟欲往南山馬上口號與別

城隅一分手幾日還相見
山中有桂花莫待花如霰

雜詩二首

家住孟津河門對孟津口
常有江南船寄書家中否
君自故鄉來應知故鄉事
來日綺牕前寒梅著花未

相思

紅豆生南國秋來發幾枝
願君多采擷此物最相思

哭孟浩然

故人不可見漢水日東流
借問襄陽老江山空蔡州

少年行

新豐美酒斗十千
咸陽遊俠多少年
相逢意氣為君飲
繫馬高樓垂柳邊

一身能擘兩雕弧
虜騎千重只似無
偏坐金鞍調白羽
紛紛射殺五單于

九月九日憶山東兄弟

獨在異鄉為異客
每逢佳節倍思親
遙知兄弟登高處
遍插茱萸少一人

送元二使安西

渭城朝雨裊輕塵
客舍青青柳色新
勸君更盡一杯酒
西出陽關無故人

送韋評事

欲逐將軍取右賢
沙場走馬向居延
遙知漢使蕭關外
愁見孤城落日邊

送沈子歸江東

楊柳渡頭行客稀
罌師盪槳向臨圻
唯有相思似春色

江南江北送君歸

寒食汜上作

廣武城邊逢暮春
汶陽歸客淚沾巾
落花寂寂啼山鳥

楊柳青青渡水人

王縉

同王昌齡裴迪遊青龍寺曇壁上人兄院集和兄

維

林中空寂舍階下終南山高卧一牀地迴看六合間浮

雲幾處滅飛鳥何時還問義天人接無心世界間誰知
大隱者兄弟自追攀

別輞川別業

山月曉仍在林風涼不絕殷勤如有情惆悵令人別

裴迪

孟城坳

結廬古城下時登古城上古城非疇昔今人自來往

華子岡

落日松風起還家草露晞雲光侵履跡山翠拂人衣

斤竹嶺

明流紆且直綠篠密復深一逕通山路行歌望舊岑

鹿柴

日夕見寒山便為獨往客不知深林事但有麝麝跡

木蘭柴

蒼蒼落日時鳥聲亂谿水緣谿路轉深幽興何時已

茱萸泝

飄香亂椒挂布葉間檀欒雲日雖迴照森沈猶自寒

宮槐陌

門前宮槐陌是向歌湖道秋來山雨多落葉無人掃

南垞

孤舟信一泊南垞湖水岸落日下崦嵫清波殊淼漫

金屑泉

縈渟澹不流金碧如可拾迎晨含素華獨往事朝汲

白石灘

跂石復臨水弄波情未極日下川上寒浮雲淡無色

辛夷塢

綠堤春草合王孫自留翫況有辛夷花色與芙蓉亂

輞口遇雨憶終南山因獻王維

積雨晦空曲平沙滅浮彩輞水去悠悠南山復何在

崔九欲往南山馬上口號與別

歸山深淺去須盡丘壑美莫學武陵人暫遊桃源裏

崔興宗

同王右丞送瑗公南歸

行苦神亦秀泠然谿上松銅瓶與竹杖來自祝融峰常
願入靈嶽藏經訪遺蹤南歸見長老且為說心胸

留別王維

駐馬欲分襟清寒御溝上前山景氣佳獨往還惆悵

儲光羲

泛茅山東谿

清晨登仙峰峰遠行未極江海霽初景草木含新色而

我任天和此時聊動息望鄉白雲裏發棹清谿側松栢
生深山無心自貞直

游茅山

平生非作者望古懷清芬以道為際行將時不羣茲
山在人境靈貺久傳聞遠勢一峰出近形千嶂分冬春
有茂草朝暮多鮮雲此去亦何極但言西日曛

昔賢居柱下今我去人間良以直心曠兼之外視閒垂
綸非釣國好學異希顏落日登高嶼悠然望遠山谿流

碧水去雲帶清陰還想見中林士巖扉長不關

名嶽徵仙事清都訪道書山門入松栢天路涵空虛南
極見朝采西潭聞夜漁遠心尚雲宿浪跡出林居為己
存實際忘形同化初此行良已矣不樂復何如

夜到洛口入黃河

河洲多青草朝暮增客愁客愁惜朝暮枉渚暫停舟中
宵大川靜解纜逐歸流浦澈既清曠沿洄非阻脩登臚
望落月擊汰悲新秋倘遇乘槎客永言星漢遊

泊舟貽潘少府

行子苦風潮維舟未能發宵分卷前幔卧視清秋月四
澤葭葦深中洲煙火絕蒼蒼水霧起落落疎星沒所遇
盡漁商與言多楚越其如念極浦又以思明哲常若干
里餘況之異鄉別

終南幽居獻蘇侍郎

中歲尚微道始知將谷神抗策還南山水木自相親深
林開一道青嶂成四鄰平明去采薇日入行刈薪雲歸

萬壑暗雪罷千巘春始看玄鳥來已見瑤華新寄言寡
芳者無乃後時人

酬綦毋校書夢邪溪見贈之作

校文在仙掖每有滄洲心况以北牕下夢遊清溪陰春
看湖水漫夜入迴塘深往往纜垂葛出舟望前林山人
松下飯釣客蘆中吟小隱何足貴長年固可尋還車首
東道惠言若黃金以我采薇意傳之天姥岑

登戲馬臺作

君不見宋公杖鉞誅燕後英雄踴躍爭趨走小會衣冠
呂梁壑大徵甲卒礪礪口天開神武樹元勲九日茱萸
饗六軍泛泛樓船遊極浦搖搖歌吹動浮雲居人滿目
市朝變霸業猶存齊楚甸泗水南浮桐栢川沂山北走
瑯琊縣滄海沈沈晨霧開彭城烈烈秋風來少年自言
未得意日暮蕭條登古臺

霽後貽馬十二巽

高天風雨散清氣在園林況我夜初靜當軒鳴綠琴雲

開北堂月庭滿南山陰不見長裾者空歌遊子吟

題陸山人樓

暮聲雜初雁夜色涵早秋獨見海中月照君池上樓山
雲拂高棟天漢入雲流不惜朝光滿其如千里遊

寒夜江口泊舟

寒潮信未起出浦纜孤舟一夜苦風浪自然增旅愁吳
山遲海月楚火照江流欲有知音者異鄉誰可求

尋徐山人遇馬舍人

泊舟伊川右正見野人歸日暮春山綠我心清且微
聲風雨度水氣雲霞飛復有金門客來參蘿薜衣

寄孫山人

新林二月孤舟還水滿清江花滿山借問故園隱君子
時時來往在人間

丘為

尋西山隱者不遇

絕頂一茅茨直上三十里扣關無僮僕窺室唯案几若

非巾柴車應是釣秋水差池不相見
黽俛空仰止草色新雨中松聲晚牕裏
及茲契幽絕自足蕩心耳雖無賓主意
頗得清淨理興盡方下山何必待之子

題農舍

東風何時至已綠湖上山湖上春既早
田家日不閒溝塍流水處耒耜平蕪間
薄暮飯牛罷歸來還閉關

留別王維

歸鞍白雲外繚繞出前山今日又明日
自知心不閒親

勞簪組送欲趁鶯花還一步一回首遲遲向近關

左掖梨花

冷艷全欺雪餘香乍入衣春風且莫定吹向玉階飛

祖詠

歸汝墳山莊留別盧象

淹留歲將晏久廢南山期舊業不見棄還山從此辭
漚麻入南澗刈麥向東畝對酒雞黍熟閉門風雪時
非君一延首誰慰遙相思

夕次圃田店

前路入鄭郊尚經百餘里馬煩時欲歇客歸程未已落
日桑柘陰遙村烟火起西還不遑宿中夜渡涇水

田家即事

舊居東臯上左右俯荒村樵路前傍嶺田家遙對門歡
娛始披拂愜意在郊原餘霽蕩川霧新秋仍晝昏攀條
憩林麓引水開泉源稼穡豈云倦桑麻今正繁方求靜
者賞偶與潛夫論雞黍何必具吾心知道尊

長樂驛留別盧象裴總

朝來已握手宿別更傷心
灞水行人渡商山驛路深
故情君且足謫宦我難任
直道皆如此誰能淚滿襟

蘇氏別業

別業居幽處到來生隱心
南山當戶牖澧水在園林
竹覆經冬雪庭昏未夕陰
寥寥人境外閒坐聽春禽

題韓少府水亭

梅福幽棲處佳期不忘還
鳥啼當戶竹花繞傍池
山水

氣侵堦冷藤陰覆座閒寧知武陵趣宛在市朝間

望薊門

燕臺一望客心驚
簫鼓喧喧漢將營
萬里寒光生積雪
三邊曙色動危旌
沙場烽火連胡月
海畔雲山擁薊城
少小雖非投筆吏
論功還欲請長纓

家園夜坐寄郭微

前堦微雨歇開戶散窺林
月出夜方淺水涼池更深
餘風生竹樹清露薄衣襟
遇物遂遙歎懷人滋遠心
依稀

成夢想影響絕徽音誰念窮居者明時嗟陸沈

終南望餘雪

終南陰嶺秀積雪浮雲端林表明霽色城中增暮寒

盧象

家叔徵君東谿草堂

開山十餘里青壁森相倚欲識堯時天東谿白雲是雷
聲轉幽壑雲氣香流水澗影生龍蛇巖端翳樛梓大道
終不易君恩曷能已鶴羨無老時龜言攝生理浮年笑

六甲元化潛一指未暇掃雲梯空慙阮家子

送祖詠

田家宜伏臘歲晏子言歸石路雪初下荒村雞共飛東
野多烟火北澗隱寒暉滿酌野人酒倦聞鄰女機胡為
困樵采幾日罷朝衣

寄河上段十六

與君相識即相親聞道君家住孟津為見行舟試借問
客中時有洛陽人

殷遙

山行

寂歷青山曉
山行趣不稀
野花成子落
江燕引雛飛
暗草薰苔徑
晴楊掃石磯
俗人猶語此
余亦轉忘歸



唐賢三昧集卷上

欽定四庫全書

集部

唐賢三昧集卷中

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官編修臣徐秉敬

謄錄監生臣陳實君

欽定四庫全書

唐賢三昧集卷中

刑部尚書王士禎編

孟浩然

登江中孤嶼贈白雲先生王迴

悠悠清江水水落沙嶼出迴潭石下深綠篠岸傍密鮫
人潛不見漁父歌自逸憶與君別時泛舟如昨日夕陽
開返照中坐興非一南望鹿門山歸來恨如失

秋登蘭山寄張五

北山白雲裏隱者自怡悅相望試登高心隨鴈飛滅
愁因薄暮起興是清秋發時見歸村人沙行渡頭歇
天邊樹若薺江畔洲如月何當載酒來共醉重陽節

湖中旅泊寄閻九司戶防

桂水通百越扁舟期曉發荆雲蔽三巴夕望不見家
襄王夢行雨才子謫長沙長沙饒瘴癘胡為苦留滯
久別思欸顏承歡懷接袂接袂杳無由徒增旅泊愁
清猿不思欸顏承歡懷接袂接袂杳無由徒增旅泊愁
清猿

可聽沿月下湘流

宿揚子津寄長山劉隱士

所思在建業欲往大江深
日夕望京口烟波愁我心
心馳茅山洞目極楓樹林
不見少微隱星霜勞夜吟

夏日南亭懷辛大

山光忽西落池月漸東上
散髮乘夕涼開軒卧閒敞
荷風送香氣竹露滴清響
欲取鳴琴彈恨無知音賞
感此懷古人中宵勞夢想

尋香山湛上人

朝遊訪名山山遠在空翠氛氲亘百里日入行始至杖
策尋故人解鞍暫停騎石門殊豁險篁逕轉深邃法侶
欣相逢清談曉不寐平生慕真隱累日求靈異野老朝
入田山僧暮歸寺松泉多逸響苔壁饒古意谷口聞鐘
聲林端識香氣

近本以上二句
在第五第六

願言投此山身世兩相

棄

宿天台桐栢觀

海行信風帆夕宿逗雲島
緬尋滄洲趣近愛赤城好
捫蘿亦踐苔輟棹恣探討
息陰憩桐栢采秀弄芝草
鶴唳清露垂雞鳴信潮早
願言解纓紱從此無煩惱
高步凌四明玄蹤得三老
紛吾遠遊意學彼長生道
日夕望三山雲濤空浩浩

峴潭作

石潭傍隈隩沙岸曉黃緣
試垂竹竿釣果得槎頭鱖
美人騁金錯纖手膾紅鮮
因謝陸內史蓴羹何足傳

題終南翠微寺空上人房

翠微終南裏雨後宜返照閉關久沈冥杖策一登眺遂
造幽人室始知靜者妙儒道雖異門雲林頗同調兩心
喜相得畢景共譚笑暝還高牕眠時見遠山燒緬懷赤
城標更憶臨海嶠風泉有清音何必蘇門嘯

宿業師山房待丁大不至

夕陽度西嶺羣壑條已暝松月生夜涼風泉滿清聽樵
人歸欲盡煙鳥棲初定之子期宿來孤琴候蘿逕

耶谿泛舟

落景餘清輝輕撓弄谿渚
澄明愛水物臨泛何容與
白首垂釣翁新妝浣紗女
相看似相識脈脈不得語

彭蠡湖中望廬山

太虛生月暈舟子知天風
挂席候明發眇漫平湖中
中流見匡阜勢壓九江雄
黝黝容霽色崢嶸當曉空
香爐初上日瀑布噴成虹
久欲追尚子况茲懷遠公
我來限于役未暇息微躬
淮海速將半星霜歲欲窮
寄言巖栖

者畢趣當來同

登鹿門山

清曉因興來乘流越江峴沙禽近方識浦樹遙莫辨漸
至鹿門山山明翠微淺澗潭多屈曲舟楫屢迴轉昔聞
龐德公采藥遂不返金澗餌芝朮石牀卧苔蘚紛吾感
耆舊結纜事攀踐隱迹今尚存高風邈已遠白雲何時
去丹桂空偃蹇探討意未窮迴艫夕陽晚

遊明禪師西山蘭若

西山多奇狀秀出倚前楹亭午收彩翠夕陽照分明吾
師住其下禪坐證無生結廬就嵌窟翦茗通徑行談空
對樵叟授法與山精日暮方辭去田園歸冶城

疾愈過龍泉寺精舍呈易業二公

亭午聞山鐘起行散愁疾尋林采芝去谷轉松蘿密傍
見精舍開長廊飯僧畢石渠流雪水金子耀霜橘竹房
思舊遊過憩終永日入洞窺石髓傍崖采蜂蜜日暮辭
遠公虎谿相送出

萬山潭作

垂釣坐磐石水清心亦閒
魚行潭樹下猿挂島藤間
游女昔解珮傳聞於此山
求之不可得沿月棹歌還

早發漁浦潭

東旭早光芒渚禽已驚聒
卧聞漁浦口撓聲暗相撥
日出氣象分始知江路闊
美人常晏起照影弄流沫
飲水畏驚猿祭魚時見獺
舟行自無悶况值晴景豁

歲暮海上作

仲尼既云歿余亦浮于海昏見斗柄迴方知歲星改虛
舟任所適垂釣非有待為問乘槎人滄洲復何在

聽鄭五彈琴

阮籍推名飲清風滿竹林半酣下衫袖拂拭龍唇琴一
杯彈一曲不覺夕陽沈予意在山水聞之諧夙心

和張二自穰縣還途中遇雪

風吹沙海雪漸作柳園春宛轉隨香騎輕盈伴玉人歌
疑郢中客態比洛川神今日南歸楚雙飛似入秦

望洞庭湖贈張丞相

八月湖水平涵虛混太清
氣蒸雲夢澤波撼岳陽城
欲濟無舟楫端居恥聖明
坐觀垂釣者徒有羨魚情

宿永嘉江寄山陰崔少府國輔

我行窮水國君使入京華
相去日千里孤帆天一涯
卧聞海潮至起視江月斜
借問同舟客何時到永嘉

夜泊廬江聞故人在東寺詩寄之

江路經廬阜松門入虎谿
聞君尋寂樂清夜宿招提
石

鏡山精怯禪枝怖鵲棲一燈如悟道為照客心迷

宿桐廬江寄廣陵舊遊

山暝聽猿愁滄江急夜流風鳴兩岸葉月照一孤舟建
德非吾土維揚憶舊遊還將兩行淚遙寄海西頭

澗南即事貽皎上人

樊廬在郭外素產惟田園左右林野曠不聞朝市喧釣
竿垂北澗樵唱入南軒書取幽棲事將尋靜者論

九日懷襄陽

去國似如昨，悠然經杪秋。峴山望不見，風景令人愁。
誰采籬下菊，應閒池上樓。宜城多美酒，歸與葛彊遊。

初出關旅亭夜坐懷王大校書

向夕槐烟起，葱蘢池館曠。客中無偶坐，關外惜離羣。
燭至螢光滅，荷枯雨滴聞。永懷芸閣友，寂寞滯揚雲。

早寒江上有懷

木落鴈南渡，北風江上寒。我家襄水曲，遥隔楚雲端。
鄉淚客中盡，孤帆天際看。迷津欲有問，平海夕漫漫。

留別王侍御維

寂寂竟何待朝朝空自歸
欲尋芳草去惜與故人違
當路誰相假知音世所稀
祇應守寂寞還掩故園扉

廣陵別薛八

士有不得志栖栖吳楚間
廣陵相遇罷彭蠡泛舟還
檣出江中樹波連海上山
風帆明日遠何處更追攀

與諸子登岷山作

人事有代謝往來成古今
江山留勝跡我輩復登臨
水

落魚梁淺天寒夢澤深羊公碑尚在讀罷淚沾襟

尋天台山

吾友太乙子餐霞卧赤城欲尋華頂去不憚惡溪名歇
馬憑雲宿揚帆截海行高高翠微裏遙見石梁橫

晚泊潯陽望廬山

挂席幾千里名山都未逢泊舟潯陽郭始見香爐峯嘗
讀遠公傳遠懷塵外蹤東林精舍近日暮坐聞鐘

武陵泛舟

武陵川路狹前棹入花林
莫測幽源裏仙家信幾深
水迴青嶂合雲渡綠谿陰
坐聽閒猿嘯彌清塵外心

遊精思觀迴王白雲在後

出谷未亭午至家日已曛
迴瞻下山路但見牛羊羣
樵子暗相失草蟲寒不聞
衡門猶未掩佇立望夫君

題大禹寺義公房

義公習禪處結構依空林
戶外一峰秀堦前羣壑深
夕陽連雨足空翠落庭陰
看取蓮花淨應知不染心

裴司士員司戶見尋

府僚能枉駕家醞復新開落日池上酌清風松下來廚
人具難黍稚子摘楊梅誰道山公醉猶能騎馬回

李氏園卧疾

我愛陶家趣園林無俗情春雷百卉坼寒食四鄰清伏
枕嗟公幹歸山羨子平年年白社客空滯洛陽城

歲暮歸南山

北闕休上書南山歸敝廬不才明主棄多病故人疎白

髮催年老青陽逼歲除永懷愁不寐松月夜窻虛

舟中曉望

挂席東南望青山水國遙舳艫爭利涉來往接風潮問
我今何適天台訪石橋坐看霞色晚疑是赤城標

夜泊牛渚趁薛八船不及

星羅牛渚夕風退鷁舟遲浦漱嘗同宿烟波忽間之榜
歌空裏失船火望中疑明發泛湖海茫茫何處期

夜渡湘水

客舟貪利涉閭裏渡湘川露氣聞芳杜歌聲識采蓮榜
人投岸火漁子宿潭烟行侶時相問潯陽何處邊

永嘉上浦館逢張八子容

逆旅相逢處江村日暮時衆山遙對酒孤嶼共題詩解
宇鄰鮫室人烟接島夷鄉園萬餘里失路一相悲

宿武陽即事

川暗夕陽盡孤舟泊岸初嶺猿相叫嘯潭影似空虛就
枕滅明燭扣舷聞夜漁雞鳴問何處人物是秦餘

陪張丞相自松滋江東泊渚宮

放溜下松滋登舟命楫師詎忘經濟日不憚沍寒時岸
幘豈獨古濯纓良在茲政成人自理機息鳥無疑雲物
凝孤嶼江山辨四維晚來風稍緊冬至日行遲獵響驚
雲夢漁歌激楚辭渚宮何處是川暝欲安之

西山尋辛諤

漾舟乘水便因訪故人居落日晴川裏誰言獨羨魚石
潭窺洞徹沙岸厯紆徐竹嶼見垂釣茅齋聞讀書欸言

忘景夕清興屬涼初回也一瓢飲賢哉常晏如

夜泊宣城界

西塞沿江島南陵問驛樓湖平津濟闊風止客帆收去
去懷前事茫茫泛夕流石逢羅刹礙山泊敬亭幽火識
梅根冶烟迷楊葉洲離家復水宿相伴賴沙鷗

送杜十四之江南

荆吳相接水為鄉君去春江正淼茫日暮征帆何處泊
天涯一望斷人腸

王昌齡

塞下曲

蟬鳴空桑林八月蕭關道出塞復入塞處處黃蘆草從
來幽并客皆共塵沙老莫學游俠兒矜誇紫騮好
飲馬渡秋水水寒風似刀平沙日未沒黯黯見臨洮昔
日長城戰咸言意氣高黃塵足今古白骨亂蓬蒿

鄭縣宿陶太公館中贈馮六元二

儒有輕王侯脫略當世務本家藍田下非為漁弋故無

何困躬耕且欲馳永路幽居與君近出谷同所驚昨日
辭石門五年變秋露雲龍未相感干謁亦已屢予為黃
綬羈余忝蓬山顧京門望西嶽百里見郊樹飛雨祠上
來靄然關中暮驅車鄭城宿秉燭論往素山月出華陰
開此河渚霧清光比故人豁達展心晤馮公尚戢翼元
子仍跼步張范善終始吾等豈不慕罷酒當涼風屈伸
備冥數

聽彈風入松閨贈楊補闕

商風入我絃夜竹深有露絃悲與林寂清景不可度寥
落幽居心颼颼青松樹松風吹草白谿水寒日暮聲意
去復還九變待一顧空山多雨雪獨立君始悟

緱氏尉沈興宗置酒南谿留贈

林色與谿古深篁引幽翠山樽在漁舟棹月情已醉始
窮清源口壑絕人境異春泉滴空崖萌草拆陰地久之
風榛寂遠聞樵聲至海鴈時獨飛永然滄洲意古時青
冥客滅跡淪一尉吾子躊躇心豈其紛埃事緱峯信所

尅濟北餘乃遂齊物意已會息肩理猶未卷舒形性表
脫略賢哲議仲月期角巾飯僧嵩陽寺

同從弟南齋翫月憶山陰崔少府

高卧南齋時開帷月初吐清輝澹水木演漾在窻戶
苒幾盈虛澄澄變今古美人清江畔是夜越吟苦千里
其如何微風吹蘭杜

巴陵別劉處士

劉生隱岳陽心遠洞庭水偃帆入山郭一宿楚雲裏竹

映秋館深月寒江門起烟波挂陽接日夕數千里嫋嫋
清夜猿孤舟坐如此湘中有來鴈雨雪候音旨

宿裴氏山莊

蒼蒼竹林暮吾亦知所投靜坐山齋月清谿聞遠流西
峯下微雨向曉白雲收遂解塵中組終南春可遊

齋心

女蘿覆石壁谿水幽蒙籠紫葛蔓黃花媚娟寒露中朝
飲花上露夜卧松下風雲英化為水光采與我同日月

蕩精魄寥寥天宇空

江上聞笛

橫笛怨江月扁舟何處尋聲長楚山外曲遶胡關深相
去萬餘里遙傳此夜心寥寥浦澈寒響盡惟幽林不知
誰家子復奏邯鄲音水客皆擁棹空霜遂盈襟羸馬望
北走遷人悲越吟何當邊草白旌節隴城陰

趙十四兄見訪

客來舒長簾開閣延清風但有無絃琴共君盡樽中晚

來嘗讀易頃者欲還嵩世事何須道黃精且養蒙嵇康
殊寡識張翰獨知終忽憶鱸魚膾扁舟往江東

過華陰

雲起太華山雲山互明滅東峯始含景了了見松雪羈
人感幽棲宵映轉竒絕欣然忘所疲永望吟不輟信宿
百餘里出關玩新月何意昨來心遇物遂遷別人生屢
如此何以肆愉悅

送李擢遊江東

清洛日夜漲微風引孤舟離觴便千里遠夢生江樓楚
國橙橘暗吳門烟雨愁東南具今古歸望山雲秋

客廣陵

樓頭廣陵近九月在南徐秋色明海縣寒烟生里閭夜
帆歸楚客昨日渡江書為問易名叟垂綸不見魚

宿京江口期劉春虛不至

霜天起長望殘月生海門風靜夜潮滿城高寒氣昏故
人何寂寞久已垂清言明發不能寐徒盈江上樽

答武陵田太守

仗劍行千里微軀敢一言
曾為大梁客不負信陵恩

送張四

楓林已愁暮楚水復堪悲
別後冷山月清猿無斷時

從軍行

烽火城西百尺樓黃昏獨上海風秋更吹羌笛關山月
無那金閨萬里愁

琵琶起舞換新聲總是關山離別情
撩亂邊愁彈不盡

高高秋月照長城

大漠風塵日色昏
紅旗半捲出轅門
前軍夜戰洮河北
已報生擒吐谷渾

出塞

秦時明月漢時關
萬里長征人未還
但使龍城飛將在
不教胡馬度陰山

西宮春怨

西宮夜靜百花香
欲捲珠簾春恨長
斜抱雲和深見月

朦朧樹色隱昭陽

西宮秋怨

芙蓉不及美人妝
水殿風來珠翠香
誰分含情掩秋扇
空懸明月待君王

長信秋詞

奉帚平明金殿開
且將團扇共徘徊
玉顏不及寒鴉色
猶帶昭陽日影來

真成薄命久尋思
夢見君王覺後疑
火照西宮知夜飲

分明複道奉恩時

青樓怨

白馬金鞍從武皇
旌旗十萬宿長楊
樓頭小婦鳴箏坐
遙見飛塵入建章

李四倉曹宅夜飲

霜天留飲故情歡
銀燭金爐夜不寒
欲問吳江別來意
青山明月夢中看

聽流人水調子

孤舟微月對楓林
分付鳴箏與客心
嶺色千重萬重雨
斷絃收與淚痕深

梁苑

梁園秋竹古時烟
城外風悲欲暮天
萬乘旌旗何處在
平臺賓客有誰憐

送魏二

醉別江樓橘柚香
江風引雨入船涼
憶君遙在瀟湘月
愁聽清猿夢裏長

芙蓉樓送辛漸

寒雨連江夜入吳，平明送客楚山孤。
洛陽親友如相問，一片冰心在玉壺。

丹陽城南秋海陰，丹陽城北楚雲深。
高樓送客不能醉，寂寂寒江明月心。

重別李評事

莫道秋江離別難，舟船明日是長安。
吳姬緩舞留君醉，隨意青楓白露寒。

盧谿主人

武陵谿口駐扁舟
谿水隨君向北流
行到荆門上三峽
莫將孤月對猿愁

送柴侍御

沅水通波接武岡
送君不覺有離傷
青山一道同雲雨
明月何曾是兩鄉

劉春虛

江南曲

美人何蕩瀟湖上風日長玉手欲有贈徘徊雙明璫歌
聲隨綠水怨色起春陽日暮還家望雲波橫洞房

暮秋揚子江寄孟浩然

木葉紛紛下東南日烟霜林山相晚暮天海空青蒼
暝色况復久秋聲亦何長孤舟兼微月獨夜仍越鄉
寒笛對京口故人在襄陽詠思勞今夕江漢遙相望

潯陽陶氏別業

陶家習先隱種柳長江邊朝夕潯陽郭白衣來幾年
霽

雲明孤嶺秋水澄寒天物象自清曠野情何繇聯蕭蕭
丘中賞明宰非徒然願守黍稷稅歸耕東山田

登廬山峰頂寺

孤峰臨萬象秋氣何高清晰天際南郡出林端西江明山
門二緇叟振錫聞幽聲心照有無界業懸前後生徒知
真機靜尚與愛網并方首金門路未遑參道情

尋東谿還湖中作

出山更回首日暮清谿深東嶺新別處數猿叫空林昔

遊有初迹此路還獨尋幽興方在往歸懷復為今雲峰
勞前意湖水成遠心望望已超越坐鳴舟中琴

寄閻防

青冥南山口君與緇錫鄰深路入古寺亂花隨暮春紛
紛對寂寞往往落衣巾松色空照水經聲時有人晚心
復南望山遠情獨親應以修往業亦惟立此身深林度
空夜烟月資清真莫歎文明日彌年徒隱淪

送東林廉上人還廬山

石谿流已亂苔筵入漸微日暮東林下山僧還獨歸常
為爐峰意況與遠公違道性深寂寞世情多是非曾尋
名山去豈復無清機

闕題

道由白雲盡春與青谿長時有落花至遠隨流水香閒
門向山路深柳讀書堂幽映每白日清輝照衣裳

寄江滔求孟六遺文

南望襄陽路思君情轉親偏知漢水廣應與孟家鄰在

日貪為善昨來聞更貧相如有遺草一為問家人

常建

送李十一尉臨谿

泠泠花下琴君唱渡江吟天際一帆影預懸離別心以
言神仙尉因致瑤華音回軫撫商調越谿澄碧林

送楚十少府

微風吹霜氣寒影流前除落日未能別蕭蕭林木虛愁
烟閉千里仙尉其何如因送別鶴操贈之雙鯉魚鯉魚

在金盤別鶴哀有餘心事則如此請君開素書

江上琴興

江上調玉琴一絃清一心泠泠七絃遍萬木澄幽陰能使江月白又令江水深始知枯桐枝可以徽黃金

宿王昌齡隱居

清谿深不測隱處惟孤雲松際露微月清光猶為君茅亭宿花影藥院滋苔紋余亦謝時去西山鸞鶴羣

閒齋卧雨行樂至山館稍次湖亭二首

旬時結陰霖簾外初白日齋沐清病容心魂畏虛室閒
梅照前戶明鏡悲舊質同袍四五人何不來問疾

行藥至石壁東風變萌芽主人山門綠小隱湖中花時
物堪獨往春帆宜別家辭君向滄海爛漫從天涯

仙谷遇毛女意知是秦宮人

谿口水石淺泠泠明藥叢入谿雙峰峻松枯疎幽風垂
嶺枝嫋嫋翳泉花濛濛黃綠霽人目路盡心彌通盤石
橫陽岸前流殊未窮回潭清雲影瀾漫長天空水邊一

神女千歲為玉童羽毛經漢代珠翠逃秦宮目覩神已
寓鶴飛言未終祈君青雲秘願謁黃仙翁嘗以耕玉田
龍鳴西頂中金梯與天接幾日來相逢

夢太白西峰

夢寐升九崖杳靄逢元君遺我太白岑寥寥辭垢氛結
宇在星漢宴林閉氤氲檐楹覆餘翠巾鳥生片雲時往
谿谷間孤亭晝仍曛松峰引天影石瀨清霞文恬目緩
舟趣霽心投鳥羣春風又搖擢潭島花紛紛

晦日馬鎗曲稍次中流作

夜寒宿蘆葦曉色明西林初日在川上便澄遊子心晴
天無纖翳郊野浮春陰波靜隨釣魚舟小綠水深出浦
見千里曠然諧遠尋扣舷應漁父因唱滄浪吟

西山

一身為輕舟落日西山際常隨去帆影遠接長天勢物
象歸餘清林巒分夕麗亭亭碧流暗日入孤霞繼渚日
遠陰映湖雲尚明霽林昏楚色來岸遠荆門閉至夜轉

清迴蕭蕭北風厲沙邊鴈鷺泊宿處蕭蕭蔽圓月逗前
浦孤琴又搖曳冷然夜遂深白露霑人袂

弔王將軍墓

嫖姚北伐時深入幾千里戰餘落日黃軍敗鼓聲死嘗
聞漢飛將可奪單于壘今與山鬼鄰殘兵哭遼水

題破山寺後院

清晨入古寺初日照高林竹逕通幽處禪房花木深山
光悅鳥性潭影空人心萬賴此俱寂但餘鐘磬音

三日尋李九莊

雨歇楊林東渡頭
永和三日盪輕舟
故人家在桃花岸
直到門前谿水流

送宇文六

花映垂楊漢水清
微風林裏一枝輕
即今江北還如此
愁殺江南離別情

李頎

塞下曲

黃雲鴈門郡日暮風沙裏千騎黑貂裘皆稱羽林子金
茄吹朔雪鐵馬嘶雲水帳下飲蒲萄平生寸心是

漁父歌

白首何老人簑笠蔽其身避世長不仕釣魚清江濱浦
沙明濯足山月靜垂綸寓宿湍與瀨行歌秋復春持竿
湘岸竹蕪火蘆洲新綠水飯香稻青荷包紫鱗於中還
自樂所欲全吾真而笑獨醒者臨流多苦辛

東郊寄萬楚

落久無用隱身甘采薇仍聞薄宦者還事田家衣
水日夜流故人相見稀春山不可望黃鳥東南飛
濯足豈長往一樽聊可依了然潭上月適我胸中機
在昔同門友如今出處非優游白虎殿偃息青瑣闥
且有薦君表當看攜手歸寄書不待面蘭茝空芳菲

寄萬齊融

名高不擇仕委世隨虛舟小邑常嘆屈故鄉行可遊
青楓半村戶香稻盈田疇為政日清淨何人同海鷗
搖巾

北林夕把菊東山秋對酒池風滿向家湖水流岸陰止
鳴鶴山色映潛虬靡靡俗中理蕭蕭川上幽昔年至吳
郡常憶卧江樓我有一書札因之芳杜洲

登首陽山謁夷齊廟

古人已不見喬木竟誰過寂寞首陽山白雲空復多蒼
苔歸地骨皓首采薇歌畢命無怨色成仁其若何我來
入遺廟時候微清和落日弔山鬼回風吹女蘿石門正
西豁引領望黃河千里一飛鳥孤光東逝波驅車層城

路惆悵此巖阿

送王昌齡

漕水東去遠送君多暮情
淹留野寺出向背孤山明
前望數千里中無蒲稗生
夕陽滿舟楫但愛微波清
舉酒林月上解衣沙鳥鳴
夜來蓮花界夢裏金陵城
歎息此離別悠悠江海行

留別王盧二拾遺

此別不可道此心當報誰
春風灞水上飲馬桃花時
誤

作好文士只令遊宦遲留書下朝客我有故山期

古從軍行

白日登山望烽火黃昏飲馬傍交河行人刁斗風沙暗
公主琵琶幽怨多野雲萬里無城郭雨雪紛紛連大漠
胡鴈哀鳴夜夜飛胡兒眼淚雙雙落聞道玉門猶被遮
應將性命逐輕車年年戰骨埋荒外空見蒲桃入漢家

緩歌行

小來託身攀貴遊傾財破產無所憂暮擬經過石渠署

朝將出入銅龍樓結交杜陵輕薄子謂言可生復可死
一沈一浮會有時棄我翻然如脫屣男兒立身須自強
十年閉戶潁水陽業就功成見明主擊鐘鼎食坐華堂
二八娥眉梳墮馬美酒清歌曲房下文昌宮中賜錦衣
長安陌上退朝歸五陵賓從莫敢視三省官僚揖者稀
早知今日讀書是悔作從前任俠非

放歌行答從弟墨卿

小來好文恥學武世上功名不解取雖沾寸祿已後時

徒欲出身事明主
栢梁賦詩不及宴
長楸走馬誰相數
斂迹俛眉心自甘
高歌擊節聲半苦
由是蹉跎一老夫
養雞牧豕城東隅
空歌漢代蕭相國
肯事霍家馮子都
徒爾當年聲籍籍
濫作詞林兩京客
故人斗酒安陵橋
黃鳥春風洛陽陌
吾家令弟才不羈
五言破的人共推
興來逸氣如濤湧
千里長江歸海時
別離短景何蕭索
佳句相思能間作
舉頭遙望魯陽山
木葉紛紛向人落

送劉十

三十不官亦不娶時人馬識道高下房中唯有老氏經
握上空餘少游馬往來嵩華與函秦放歌一曲前山春
西林獨鶴引閒步南澗飛泉清角巾前年上書不得意
歸卧東窻兀然醉諸兄相繼掌青史第五之名齊驃騎
烹葵摘果告我行落日夏雲縱復橫聞道謝安掩口笑
知君不免為蒼生

送康洽入京進樂府

識子十年何不過只愛歡遊兩京路朝吟左氏嬌女篇

夜誦相如美人賦長安春物舊相宜小苑蒲萄花滿枝
柳色偏濃九華殿鶯聲醉殺五陵兒曳裾此日從何所
中貴由來盡相許白袂春衫仙吏贈烏皮隱几臺郎與
新詩樂府唱堪愁御伎應傳鴝鵒樓西上雖因長公主
終須一見曲陽侯

別梁鎰

梁生倜儻心不羈途窮氣蓋長安兒回頭轉盼似鷗鷖
有志飛鳴人豈知雖云四十無祿位曾與大軍掌書記

抗辭請刃誅部曲作色論兵犯二帥一言不合龍頷侯
擊劍拂衣從此棄朝朝飲酒黃公壚脫帽露頂爭叫呼
庭中犢鼻昔嘗挂懷裏琅玕今在無時人見予多落魄
共笑狂歌非遠圖忽然遣躍紫駟馬還是昂藏一丈夫
洛陽城頭曉霜白層冰峨峨滿川澤但聞行路吟新詩
不歎舉家無擔石莫言貧賤長可欺覆簣成山當有時
莫言富貴長可託木槿朝看暮還落不見古時塞上翁
倚伏由來任天作去去滄波勿復陳五湖三江愁殺人

少室雪晴送王寧

少室衆峰幾峰別一峰晴見一峰雪隔城半山連青松
素色峨峨千萬重過景斜臨不可道白雲欲盡難為容
行人與我翫幽境北風切切吹衣冷惜別浮橋駐馬時
舉頭試望南山嶺

送陳章甫

四月南風大麥黃棗花未落桐陰長青山朝別暮還見
嘶馬出門思舊鄉陳侯立身何坦蕩虬鬚虎眉仍大顙

腹中貯書一萬卷不肯低頭在草莽東門沽酒飲我曹
心輕萬事如鴻毛醉卧不知白日暮有時空望孤雲高
長河浪頭連天黑津吏停舟渡不得鄭國遊人未及家
洛陽行子空歎息聞道故林相識多罷官昨日今如何
聽安萬善吹感策歌

南山截竹為感策此樂本自龜茲出流傳漢地曲轉奇
涼州胡人為我吹傍隣聞者多嘆息遠客思鄉皆淚垂
世人解聽不解賞長飈風中自來往枯桑老栢寒颼颼

九雛鳴鳳亂啾啾龍吟虎嘯一時發萬籟百泉相與秋
忽然更作漁陽摻黃雲蕭條白日暗變調如聞揚柳春
上林繁花照眼新歲夜高堂列明燭美酒一杯聲一曲

愛敬寺古藤歌

古藤池水盤樹根左攫右拏龍虎蹲橫空直上相陵突
丰茸離纚若無骨風雷霹靂連黑枝人言其下藏妖魑
空庭落葉作開合十月苦寒常倒垂憶昨花飛滿空殿
密葉吹香飯僧遍南階雙桐一百尺相與年年老霜霰

古意

男兒事長征，少小幽燕客。
賭勝馬蹄下，由來輕七尺。
殺人莫敢前，鬚如蝟毛磔。
黃雲隴底白，雪飛未得報。
恩不得歸，遼東小婦年十五。
慣彈琵琶，解歌舞。今為羌笛出塞聲，使我三軍淚如雨。

送劉昱

八月寒葦花，秋江浪頭白。
北風吹五兩，誰是潯陽客。
鷗鷺鵝山頭，片雨晴揚州。
郭裏暮潮生，行人夜宿金陵渚。
試

聽沙邊有鴈聲

送郝判官

楚城木葉落夏口青山轉鴻鴈向南時君乘使者傳楓
林帶水驛夜火明山縣千里送行人蔡州如眼見江連
清漢東逶迤遙望荆雲相蔽虧應問襄陽舊風俗為余
騎馬習家池

聽董大彈胡笳聲兼寄語弄房給事

蔡女昔造胡笳聲一彈一十有八拍胡人落淚向邊草

漢使斷腸對歸客古戍蒼蒼烽火寒大荒沈沈飛雪白
先拂商絃後角羽四郊秋葉驚撼撼董夫子通神明深
山竊聽來妖精言遲更速皆應手將往復旋如有情空
山百鳥散還合萬里浮雲陰且晴嘶酸雛鴈失羣夜斷
絕胡兒戀母聲川為靜其波鳥亦罷其鳴烏孫部落家
鄉遠邏娑沙塵哀怨生幽音變調忽飄灑長風吹林雨
墮瓦迸泉颯颯飛木末野鹿呦呦走堂下長安城連東
掖垣鳳凰池對青瑣門高才脫畧名與利日夕望君抱

琴至

寄鏡湖朱處士

澄霽晚流闊微風吹綠蘋
鱗鱗遠峰見淡淡平湖春
芳草日堪把白雲心所親
何時可為樂夢裏東山人

送人歸沔南

梅花今正發失路復何如
舊國雲山在新年風景餘
春饒漢陽夢日寄武陵書
可即明時老臨川莫羨魚

送盧逸人

洛陽為此別攜手更何時不復人間見祇應海上期清
谿入雲木白首卧茆茨共惜盧敖去天邊望所思

望秦川

秦川朝望迴日出正東峰遠近山河淨逶迤城闕重秋
聲萬戶竹寒色五陵松客有歸歟歎悽其霜露濃

寄司勳盧員外

流澌臘月下河陽草色新年發建章秦地立春傳太史
漢宮題柱憶仙郎歸鴻欲度千門雪侍女新添五夜香

早晚薦雄文似者故人今已賦長楊

送魏萬之京

朝聞遊子唱驪歌昨夜微霜初渡河
鴻鴈不堪愁裏聽雲山況是客中過
關城樹色催寒近御苑砧聲向晚多
莫見長安行樂處空令歲月易蹉跎

送李回

知君官屬大司農詔幸驪山職事雄
歲發金錢供御府畫看仙液注離宮
千巖曙雪旌門上十月寒花輦路中

不覩聲名與文物自傷流滯去關東

宿瑩公禪房聞梵

花宮仙梵遠微微月隱高城鐘漏稀
夜動霜林驚落葉曉聞天籟發清機
蕭條已入寒空靜颺杳仍隨秋雨飛
始覺浮生無住著頓令心地欲皈依

題璿公山池

遠公遯跡廬山岑開士幽居祇樹林
片石孤峰窺色相清池皓月照禪心
指揮如意天花落坐卧閒房春草深

此外俗塵俱不染惟餘玄度得相尋

宿香山寺石樓

夜宿翠微半高樓聞暗泉漁舟帶遠火山磬發孤烟衣
拂雲松外門清河漢邊峰巒低枕席世界接人天靄靄
花出霧輝輝星映川東林曙鶯滿惆悵欲言旋

送盧少府赴延陵

聞君從宦所何日府中趨遙指金陵縣青山天一隅行
人懷寸祿小吏獻新圖北固波濤險南天風俗殊春江

連橋抽晚景媚菰蒲漠漠花生渚亭亭雲過湖灘沙映
春火水霧斂檣烏回首東門路鄉書不可無

奉送五叔入京兼寄綦母三

雲陰帶殘日悵別此何時欲望黃山道無由見所思

寄韓鵬

為政心閒物自閒朝看飛鳥暮飛還寄書河上神明宰
羨爾城頭姑射山

百花原

百花原頭望京師黃河水流無盡時秋天曠野行人絕
馬首東來知是誰

遇劉五

洛陽一別梨花新黃鳥飛飛逢故人攜手當年共為樂
無驚蕙艸惜殘春

綦母潛

冬夜寓居寄儲太祝

自為洛陽客夫子吾知音愛義能下士時人無此心奈

何離居夜巢鳥悲空林愁坐至月上復聞南鄰砧

春泛若耶谿

幽意無斷絕此去隨所偶晚風吹行舟花路入谿口際
夜轉西壑隔山望南斗潭烟飛溶溶林月低向後生事
且瀾漫願為持竿叟

題鶴林寺

道林隱形勝向背臨層霄松覆山殿冷花藏谿路遙珊
珊寶幡挂炤炤明燈燒遲日半空谷春風連上潮少適

水木興暫令身心調願謝攜手客茲山禪侶饒

題招隱寺絢公房

開士度人久空巖花霧深徒知燕坐處不見有為心
蘭若門對壑田家路隔林還言證法性歸去比黃金

題靈隱寺山頂禪院

招提此山頂下界不相聞塔影挂清漢鐘聲和白雲
觀空靜室掩行道衆香焚且駐西來駕人天日未曛

若耶谿逢孔九

相逢此谿曲勝託在烟霞潭影竹間動巖陰簷外斜人
言上皇代犬吠武陵家借問淹留日春風滿若耶

王之渙

送別

楊柳東風樹青青夾御河近來攀折苦應為別離多

涼州詞

黃河遠上白雲間一片孤城萬仞山羌笛何須怨楊柳
春光不度玉門關

登鶴鵲樓

白日依山盡黃河入海流欲窮千里目更上一層樓

張子容

春江花月夜

林花發岸口氣色動江新此夜江中月流光花上春分
明石潭裏宜照浣紗人

送孟浩然歸襄陽

東越相逢地西亭送別津風濤看解纜雲海去愁人鄉

在桃林岸江連楓樹春因懷故園意歸與孟家鄰

閻防

晚秋石門禮拜

輕策臨絕壁招提謁金仙舟車無由徑岸嶠乃屬天躑
躑淹景夷猶望新弦石門變暝色谷口生人烟陽鴈
叫平楚秋風急寒川馳暉苦代謝浮脆暫貞堅永欲卧
丘壑息心依梵筵誓將厯劫願無以外物牽

百丈谿新理茅茨讀書

浪迹棄人世還山自幽獨始傍巢由蹤吾其獲心曲荒
庭何所有老樹半空腹秋蜩鳴北林暮鳥穿我屋栖遲
樂遵渚恬曠寡所欲開卦推盈虛散帙攻節目養閒度
人事達命知止足不學東國儒俟時勞伐輻

與永樂諸公夜泛黃河作

烟深載酒入但覺暮川虛映水見山火鳴榔聞夜漁愛
茲山水趣忽與人世疎無暇然官燭中流有望舒



唐賢三昧集卷中